

Interessanta genealogia dalla schlatta Hendry

mc. Cun la publicaziun d'in vast e bein illustrau cudisch davart la genealogia da famiglia han ils auturs Vic Hendry, Tarcisi Hendry e Beni Hendry fatg in schenghetg prezios als members dalla schlatteina Hendry che disponan ussa d'in manual custeivel davart historia e derivonza da lur famiglia.

Cun veseivel plascher ha *Benedetg Hendry* beneventau la gronda roschada da parentella ch'ei sereunida la sonda passada el hotel Alpina a Sedrun per festivar la presentaziun dil cudisch davart la historia dalla famiglia Hendry da provegnientscha tuatschina. Ordvart satisfatgs eis el ch'igl ei reussiu da cumpilar ed edir in cudisch da quella dimensiun senza sustegn public grazia alla lavur cumina gratuita dils auturs e muort il sustegn moral e finanziel da members dall'atgna schlatta. Cun lur vuschs sereneas e sonoras ha in quartet dubel, formaus ord la parentella, delectau igl auditori, vid las preits pendevan ovras creadas cun maun inschignus e bien gust artistic da members dalla schlatta. Aschia vein nus observau cheu intarsias da *Giusep Hendry*, pictura purila da *Justina Coray-Hendry*, maletgs da *Toni Monn* ed entagls da *Christian Hendry*.

Sils fastitgs dils Hendrys


Vic Hendry, enconuschents sco scribent da vaglia, ha perscrutau igl uoppen da famiglia, fastisau origins e habitadis, denton era intercuretg urdadira e tenuta dils members da schlatteina e cavigliausias impressiuns en interessants texts accumpignonts. La schlatta dils Hendrys ei stada mumnada per l'emprema gada els cudischs parochials da Tujetsch igl onn 1694. Sco ei seigi denton da supponer eri la schlatteina gia derasada el quitordischavel tschentaner en Tujetsch. Entochen viaden el 20avel tschentaner ei la derasaziun dalla schlatta selimitada enteifer las scheinas dallas uclivas da Cavorgia e Surrein, e las casas braccas dettien, malgrad lur schampradad, perdetga d'in'ampia descendenza. E Vic Hendry cuschenta buca che ses antenats seigien stai bandischai plitost agl ur dalla val ed hagian stuii tschercar lur dunnas pil pli tiels Gualers secollocai en Tujetsch. Las colonias periferas da Maunsut erien plitost paupras ed hagian buca giu savens muis e cuida pils uffecis publics da vitg e val. Nuotatonmeins hagian ils Hendrys cun lur facilitad da secommunicar, cun lur amablidad e curtesia, denton era cun lur diligenza ed endinadad, empriu da sesvolver, stai



Ils auturs dalla genealogia dils Hendrys: Da sen. a dretg: Scolast Beni Hendry, scribent Vic Hendry e scolast Tarcisi Hendry. Fotos: M. Cabalzar



Cun lur vuschs sonoras ha il quartet dubel dils Hendrys delectau la gronda raspada.



stgis per enzatgei e setratgs atras in'andanta. Dils purs da Maunsut seigi sesviluppau ina classa luvrera ed ils biadis e sutbiadis hagian giu la cuida d'emprender in mistregn. In'entira partida hagi mess neu fatschenta ed in bi chischlet dils Hendrys seigien daventai mussaders e magisters. Las clamadas religiusas ein representadas cun pader *Vigeli Berther* (1911-1979), sora *Blancarda Berther* (1901-1973), sora *Maria Ursula Berther* (1907-1989), sora *Sigisberta Hendry* (1917), sora *Carmelia Caduff* (1919), sora *Cecilia Monn* (1925) e sora *Letizia Hendry* (1935).

Diligenza unida cun senn da responsablidad, acquistai sil strebel tschespet patern, hagian contribuui il lur al success da beinenqualin. Dil Plaun S. Leci anora seigi la famiglia sefatga considerablamein. In grond diember ei staus sfurzaus da bandunar la val. Quella tendenza ei aunc s'accentuada pli espressivamein ils davos onns. A Plaun S. Leci, il liug d'origin, che deva canorta per temps a 35-40 persunas, habitescha oz aunc in soli sulet descendent dils Hendrys.

El 17avel tschentaner cattan ins la famiglia Hendry era a Breil, silsuenter eis ella morta ora. Pli numerusas ein las familias Hendry en Scozia, Engheltiara e lur descendents cattan ins oz en America ed Australia. Schebein els han denton ina relaziun directa culs Hendrys da Tujetsch ei buca stau da documentar.

Ina retschercha cunscienziusa

Cun archivar communal *Tarcisi Hendry* han ils Hendrys giu il cletg da haver in

specialist da genealogias el ravugl dall'atgna feghialonza. Cun gronda acribia, exactadad e cunscienziusadad ha el rimnau e cumpilau la genealogia dils Hendrys sur buca meins che 5 generaziuns. Sortend dil num da *Franciscus Hendry*, naschius 1694 (pia avon 300 onns), ha Tarcisi Hendry erui l'entira descendenza che dumbra oz buca meins che 300 persunas. Cun ils dus fegls da *Jacob Andriu Hendry* (1746-1805) entschiva la sromaziun cun la lingia da *Vigeli Giusep Hendry* (1784-1866) e da *Duri Vigeli Hendry* (1796-1860). Fertion che la descendenza ei stada mudesta ils emprems decennis muort la gronda mortalitad infantila e muort ils biars celibataris, ei la feghialonza carschida e daventada ordvart numerusa el vegnavel tschentaner. La genealogia revelescha denton era ina maridaglia denter cusrins ed ina feghialonza da buca meins che 15 persunas enteifer ina famiglia.

Il cudisch vegn enrihius entras las numerusas fotos da famiglia rimnadas da *Benedetg Hendry*. Il cudisch ei senza dubi in dun prezios che sclarescha ils origins e lubescha d'eruir ed intensiviar ils ligioms da parentella sur il spazi da 300 onns. L'ovra ei vegnida stampada tier la Condrau SA a Mustér. Sco quei che il responsabel per las finanzas *André Schmid* menziunescha eis ei, malgrad l'ediziun limitada, reussiu da far in prezi favoreivel grazia alla lavur gratuita dils auturs ed alla generusadad dalla parentella.

La schlatteina Hendry. Ediziuns dils auturs 1994. Squetsch Stampa Romontscha Condrau SA, Mustér. Prezi: 72.- frs.

♦ Igl uoppen dils Hendrys: Treis muotas cun in pégn enamiez ed in treifegl da mintga maun.